

# O LE SULU SAMOA



EKALESIA FAAPOTOPOTOGA KERISIANO SAMOA  
O LE NUSIPEPA FAA-LE-LOTU NA FAAVAEINA I LE T.A. 1839



FAAVAEINA 1839

O LE SULU SAMOA

OKETOPA 2021

email: [sulusamoa@cccs.org.ws](mailto:sulusamoa@cccs.org.ws) -Main Office: Ph. 24414, Ext 30 - website: [www.cccs.org.ws](http://www.cccs.org.ws)

## MALUMALU FOU, EFKS FALEALUPO-UTA



*Rev. Leama & Salamina Falatoese & Sui o le EFKS Falealupo-uta i luma o le Malumalu fou*

## OKETOPA 2021, LOTU TAMAITI LONA 123



*Rev. Kerisimasi & Viola Sani, Aoga Aso Sa & Autalavou @ Lotu Tamaiti, Ululoloa & Siusega*

# FAASINO UPU

1. O LE LAUGA	2
2. EFKS FALEALUPO-UTA	4
3. TATALA POLOKETI ZOOM	4
4. FAAILOGA MASTER MALUA	5
5. AU FAILAUGA SULU 2022	5
6. MŌLĪ LANU MŪMŪ & LAU'AVA	6
7. O LE PEROFETA MULIMULI	8
8. MEA'AI TATAU MA LE ASO	14
9. O E UAFAI LAGI FOLAUGA	15
10. ATA O MATAUPU LOMIA	16

## O LE LAUGA

Tusi Faitau: Feagaiga Tuai – Kenese 45:1-8  
Feagaiga Fou – Mataio 18:1-4

Matua: Mataio 18, *“O lea itu aso ua o ane ai le au soo ia Iesu, ua faapea ane, “O ai ea e sili i le malo o le lagi?”*

E lua vaega ua vaevaeina i ai le matua:

- i. O ai e sili?
- ii. I le malo o le lagi?

### 1. O AI E SILI?

Ua tatou i ai nei i le kuata faai'u o lenei tausaga 2021. O le vaiata e tele ina tauluga i ai taulumaga o a'oa'oga, e fai ai su'ega a le fanau ma faatalitali ai loa mo le aso e fai ai le lauga togi, ma iloa ai po o ai e sili.

O se aso fiafia tele lea i matua sa talosia ma tapua'i i le taumafai o le fanau, pe afai e faamanuiaina le tautigā o se atalii po o se afafine, e lē gata i le tulaga i le vasega, a o mataupu taitasi, o taaloga ae maise o le tulaga aoao tetele o mea e mafai ona ausia e le fanau mo le tausaga faalea'oa'oga. O le fesili, **PO O AI E SILI?** O le faailoga manino lea o le fia iloa e le tamā ma le tinā o le tulaga sa i ai lona alo i le a'oga. Pe sa faalogo ma ususita'i i le faia'oga, pe sa fai ana meaa'oga sa faatonuina ai e le faia'oga, pe sa faamaoni i polokalame uma sa faatino i totonu o le a'oga mo le tausaga atoa faalea'oa'oga.

O le ausia la o le SILI, o le faailoga manino lea o le atalii po o le afafine to'aga, ola finau, tauivi, su'esu'e,

faamaoni ma alofa i matua sa faia mea uma mo le a'oga. O se mitamitaga sili lea mo matua, a o se fiafiaga foi lea mo le atalii po o le afafine.

O la le Salamo 126, *“<sup>5</sup>O e lulu saito ma loimata, latou te seleseleina ma le alaga fiafia. <sup>6</sup>O le ua alu atu ma tagi fano, o loo ave le saito e lulu, e foi mai lava ia ma le alaga fiafia, o loo au mai ana fusi saito.”*

E le o toe po malaē i le faamoemoe o le Ekalesia i lenei masina o Novema. E fai ai lana taulaga tele, Taulaga mo Samoa, ma faamaopoopoina ai tala o isi taulaga uma – Taulaga mo Nu'u Ese, Taulaga Au Taumafai, Taulaga Au Leoleo, Tausiga/Alofa o Faifeau, ma ni isi lava foa'i mo le Tala Lelei. O le fesili, O AI E SILI? O le fia iloa e tagata lotu po o ai le Aulotu, le Pulega, le Matagaluega e maualuga ma tele lana faiga taulaga. O le fesili e fia mautinoa ai foi po o aga'i i luma pe faaititia le ma'au foa'i a le Ekalesia mai ona tagata lotu. O le agaga lava o le fesili e ese le manaia, ae maise pe afai ou te fesili ai i se tasi mo lo'u fia iloa ma lo'u fia mautinoa. Ae a la pe afai ou te fa'aaogā le fesili ma ou faapea ifo ia te a'u – “O A'U E SILI”. E sili la'u taulaga ua faia.

### 2. “I LE MALO O LE LAGI?”

O le malo lea e aliita'i ai le Atua, e pule aoao le Atua. E leai ni ana silapasi faapitoa e fai ai ni su'ega e tofofi ma filifilia ai ni ona tulaga tofi aloaia, e leai foi ni tusipasi taualoa.

Ua tuu faafeagai e Iesu le faaeaina ma le sili faalelalolagi, le mau tofiga i tulaga taualoa ma aloaia i lalo nei, ma le faaeaina i le Malo o le Lagi, le Malo o le Atua.

I le Tusi faitau o le Feagaiga Fou, sa siitia ai e Iesu le tamaitiiti ma faatū i luma o le au soo ma a'oa'oa atu ia loto faamaulalo, ia loto mamā ma ia agamalū. O a'oa'oga faaleatamai ia e ta'ita'iina ma faafae ai le sā o lē ua fia sili.

Mataio 20:20-28 o le Tusi lava lenei – Ia loto faamaulalo. O LĒ FAAMAUALUGA E FAAMAUALOINA, A O LĒ FAAMAUALO E FAAMAUALUGAINA.

Na toe alia'e ai foi le faafitauli lava lenei e tasi. Na nunu ai le to'au, solo le falute ma tupu ai le feitaga'i. Po o ai e sili? Ina ua o ane ia Iesu le au Sepetaio ma lo la'ua tina ma augani ina ia nonofo Iakopo ma Ioane i le itu taumatau ma le itu tauagavale i le malo o Iesu. O le tali manino a Iesu, e ui ina mafai ona latou faatasi

---

ma ia i le papatisoga ma inu i le ipu oona, a o le nofo i lona itu taumata ma lona itu tauagavale, o le matāfaioi totino lena a lona Tamā. A o lē sili i le malo o Iesu, o lē mulimuli – o le tagata tautua, ma auauna faamaoni.

O le Tala i le Kenese. E malamalama ma manino lelei le tala. E aumai ai foi se a’oa’oga tāua, o lo outou soifua ma so’u ola faatauva a o le mea e pule ai le Atua. A ola a’ē lava le tagata o le tagata o le manuia, po o le ā lava le mau lavasiga, o puapuagā ma faafitauli e fesoua’iina ai le ola, a e i’u manuia lava ona o le Atua.

Mai lava i le tuputupu a’ē o Iosefa i totonu o lona aiga, o ana miti, o taupulepulega a ona uso, na faatau atu i tagata Mitiana na oo i Aikupito, o tu’ua’iga, sa tigaina, falepuipui, a e na i’u i le faaeaina. O le molimau a le Tusi, “SA I A I L E A T U A F A A T A S I M A I O S E F A I M E A U M A .” O le tautinoga foi lea a Iosefa na fai atu ai i ona uso, “*O lenei, ‘aua nei tigo outou, pe fai ma mea leaga i o outou manatu ina ua outou faatau mai ia te au i le mea nei; auā na auina mai au e le Atua e muamua ia te outou e fai ma faaola.*”

Le paia e, ma le mamalu o le au faitau Sulu Samoa, ae maise le e’ē tapua’i o le Ekalesia Aoao i ona tulaga tofi, tiute ma valaauina. Malo le galulue, malo tautua i le Atua ua toe nei o se aga taunuu lo tatou sā, a o lenei e le’i a’afia si o tatou atunuu i le Koviti-19.

O le fesili – Po o ai e sili i le malo o le lagi? O le tagata ua afio faatupu ai le Agaga Paia o le Atua i lona loto ma ua pulea mai e le Agaga, e le gata i ona lagona a o ana faatinoga (tino, mafaufau, agaga). E tāua le taumafai o alo ma fanau auā o le mea patino lava lea e tatau ona fai a o i ai i lenei lalolagi e lē tumau. Saili manuia mo le tagata lava ia. Atia’ē aiga, faamaopopo le nuu ma le lotu. O A I E S I L I ?

Mo le Ekalesia ma le alo atu i faiga taulaga, ia manatua e silasila le Atua i le loto a e lē o le tino. E sili lava oe ia te oe ina ua pulea e le Atua lou loto ma e foai ai ma le fiafia ma le loto faafetai. Ia faagae’etia oe e tali atu i le Alofa tele o le Atua. Ua alu loa le malaga a le Koviti-19, ua sopoloa tulaga ma’ale’ale ma mala faalenatura. Tatou tatalo i le Atua ina ia tatou aulia atu masina ma aso o totoe o le tausaga, ma tatou faailogaina fiafia le Aso fanau o Iesu le Pepe o le Kerisimasi. O le mea alofa foa’ifuaina mai e le Atua mo le togiolaina o le lalolagi. O le Sili Sili Sili o le Atua. O A I E S I L I I L E M A L O O L E L A G I ? O lē ua lē naunau lona loto i le mea faatauva a ma ua lē

tautō faa’ole’ole; o lē ua fai le amiotonu, ua naunau i le alofa, ma ua feoa’i ma le Atua ma le loto faamaulalo.

O Iesu lava lo tatou Alii, e ui ina o Ia o le Atua, a e le’i manatu lava e u’u mau lona tulaga tutusa ma le Tamā, ua faamaulalo o Ia ia te Ia lava, ua fai mona le uiga o le pologa – ua auauna, ua tautua. Ua anaana se’i oo ina maliu i le satauro, ua magalo ai i tatou uma. A o le taulaga sili a le Atua mo oe ma a’u ma i tatou uma. Sa tanumia i le tuugamau, a e na toetu manumalo a’ia’i. Ua faaeaina e le Atua, ua avatu ia te Ia le suafa e silisili i suafa uma lava. Ia tootuli tulivae uma ma ta’uta’u atu e laulaufaiva uma, o Iesu Keriso o le Alii lava Ia.

Ia i’u foi i le viiga o le Atua le Tama. O ai e sili? I le malo o le Lagi?

Ia manuia lau faiga taulaga o lenei tausaga. Soifua ma ia manuia. Ona o Iesu. Amene.

*Saunia susuga Epati Setefano FNA,  
EFKS Lepea,  
Matagaluega FALEATA.*

---

## **UA 123 TAUSAGA O LE LOTU A TAMAITI**

Sa tatou ui uma mai ai, ina o avea i tatou ma tama iti Le faamanatu pea i soo se auga tupulaga lea aso sili Le Aso Sa faapitoa mo le fanau - o le tofi mai le Alii E tauloto, tatalo, lauga, fai tala, siva, pepese ma vivi’i

Talu le masina Me 1898, i totonu o le laumua i Malua Na a’ē ai le tofa i misionare, o tamā ma le au matutua E atofa se Aso Sa o le tausaga ia faamamalu le tāua O fanau iti a le Ekalesia, i totonu o tapuaiga i le Atua

Masina soso’o ai Iuni, a o lona Aso Sa mulimuli lava Na fai ai loa le uluai sauniga lotu e tusa ma le fuafuaga O Aulotu uma a le LMS i totonu o nuu ma alaafaga Na faasaga ane ai alo & fanau e momoli laau i Fogaa

1909 na usua i Roma le Fono Aoao a Aoga Aso Sa Fai le iuga, Aso Sa lona tolu o Oketopa e avea lena Ma aso faapitoa faavaomalo mo tamaiti o le lalolagi Suia i ai ma le Aso Sa o Tamaiti a Samoa ia o faatasi Mulimuli ane toe suia i le Aso Sa lona lua, oo mai nei Ua faamamalu e soo se ituaiga, i faigalotu Tala Lelei

---

## **FAAPAIA MALUMALU FOU** **EFKS FALEALUPO-UTA**

O le uluai aso o le masina nei o Oketopa na faapa'ia ai le Malumalu fou o le EFKS Falealupo-uta, o loo susū ai le Faafeagaiga Taulagi ia Leaula Faletoese FS ma le faletua ia Salamina. O le falesa lona lua lenei ua faia, talu ona faavaeina le Ekalesia i le tausaga 1993. O le afioga i le faletua o le Taitaifono Fono Tele, Teki Uilelea na ooti le lipine e tatalaina aloaia ai le faamoemoe. O le sauniga lotu mo le faapaiaina o le galuega, sa ta'ita'iina e le Toeaina o le Pulega Asau, susuga Amuia Seuala FT, tatalo le susuga Toese Tuia FS (Sataua), lauga le susuga Motusaga Lesa FS (Auala). O nisi sa auai e molimau ma siitia le viiga o le Atua, e aofia ai susuga Toeaina o le Matagaluega Ituotane, ma faifeau o le Pulega Asau, faapea le afioga Failautusi Komiti Au Toeaina, KMTA Faasaleleaga susuga Leaso Tupa'i FT.

O le afioga i le Taitaifono Fono Tele, susuga Iosefa Atapana Uilelea FT, na saunoa e momoli le faamalo ma le faafetai a le Ekalesia Aoa, i le susuga Faafeagaiga ma le Faletua ma le Ekalesia i Falealupo-uta, mo le soifua faatuatua, molimau ma tautua i le Atua e ala i lenei galuega tele ua latou faia. Sa ia faafetaia foi le soifua galulue ma fai taulaga i le tele o isi auala eseese, mo le Ekalesia Faapotopotoga Kerisiano Samoa. O galuega lelei uma e faia i le suafa o le Atua, e toe tauia ma faamanuiaina e le Atua i ana lava auala mamana i soo se tafa o le soifuaga nei, e oo i le ola faavavau ua uma ona saunia e Iesu Keriso le Ao o le Ekalesia. Sa taualuga lana saunoaga i le tauaao atu o le meaalofo a le Ekalesia Aoa e \$20,000 mo galuega o malumalu fou. O le afioga ia Avamoā Vaovasa mai Papa Sataua le Matuaofaiva sa fausia le galuega i le 4 masina. O le tau o le galuega e silia ma le \$100,000; na faatupe mai le Toomaga mai le Ekalesia e \$50,000 faatasi ma sailiga seleni a Matafale e 8. O loo faatau pepa o le Lūlū a le Aulotu faamoemoe o le tupe e maua mai ai, o le a muamua totogi ai le Toomaga.

O i latou na siitia mai Falealupo tai ona o aafiaga o afā o Ofa ma Valelia, na latou faatuina le Aulotu fou i uta i le 1993, ma latou fausia le uluai malumalu i le 1994. O le 1996 na i'u ai le taumafai o le susuga Leaula ma le faletua i Malua, ma latou valaaulia ai i le 1997 e avea mo latou uluai faafeagaiga. O isi Aulotu tuaoi e i ai EFKS Avātā (Peia & Eseta Lesatele), EFKS Vaotupua (Namaia & Pelemoni Kofe), EFKS Tufutafoe (Albert & Simalua Faaitaitai).

---

## **TATALA POLOKETI ZOOM MO** **KOLISI 5 A LE EFKS**

O se tasi o matātī'a fou ua faatūina e le EFKS, o lana poloketi lea mo le fa'aaogāina o le auala faatekonolosi faapitoa (ZOOM), mo a'oa'oga, su'esu'ega, ma fesootaiga i le va o Kolisi uma e 5 a le Ekalesia - Papauta, Maluafou, Nuuausala, Leulumoega fou, Tuasivi. O le auala lea ua fa'aaogāina e faatino ai fonotaga, sauniga lotu, ma isi ituaiga fesootaiga faavāomalo, ina ua afaina femalaga'iga i nei aso. Ua uma ona fa'aaogā e le Ekalesia e pei ona faatino ai lana Fono Tele Faafuase'i Oketopa 2020. A o lenei ua faatino mo a'oga a le fanau mo le ulua'i taimi. O le afioga i le Taitaifono Fono Tele, susuga Iosefa Uilelea FT na taitai le sauniga e tatala aloaia ai i le aso 7 Oketopa, mai le Kolisi Maluafou a o auai mai ai Pule ma Faia'oga o Kolisi, i luga o a latou ala-ata. Na saunoa le susuga Toeaina/Taitaifono, o se tasi lenei o molimau i le alofa mutimutivale o le Atua e lē faaititia ae fou ma siisii pea i luga, e le faapito pe pumoomoo faalotoifale, ae lautele ma faasafua ia manuia soo se tagata - e tusa ma le matua, "*O lenei, ia mutimuti vale lo outou alofa, pei ona alofa mutimuti vale o lo outou Tama.*" Na ia fautua foi ina ia fa'aaoga tatau, ia fai lelei ma le atamai o nei faamanuiaga, auā afai e leai, ona avea lea o auala faatekonolosi, o fili malosii i o latou olaga, e pei o le autū o le TFA i lea aso - Fili i le Lotoifale.

O le afioga i le Minisita o A'oga Taaloga ma Aganuu, Hon. Seuula Ioane na saunoa autū i le tatalaina aloaia o lenei faamoemoe. Na ia ta'ua o loo i ai le Schoolnet a A'oga a le Malo, ae o loo tau faalelei. Peitai o lea ua taulamua le EFKS i lenei ituaiga auala o a'oa'oga, e fa'aaoga ai metotia faatekonolosi. Na ia faa-amuia foi i auga tupulaga a le Ekalesia i nei aso, pe afai latou te fa'aaogā tatau meaalofo ua latou maua. Sa saunoa le afioga Taitaifono Komiti Aoga, Fereti Sefo FS, mai Tuasivi e faafetaia lenei faamoemoe; faapea foi le susuga Nikotemo Sopepa, o le sui o le FGFL mai lona ofisa i Fiti. O le Failautusi Aoa o le Ekalesia, susuga Vavatau Taufao FS na saunoa i le tala o lenei poloketi. O le talosaga sa tuuina atu i le FGFL (e pei foi o isi Ekalesia sui auai), na talia mai ai le \$42,109.65 e faatino ai lenei poloketi, e ala i le faatauina o televise tetele ma masini faatekonolosi, o le laisene ma isi tupe alu na totogi e maua ai le tau aofai e \$51,993.30. Viia le Alii, i lou titi fai tama.

---

**AMATA FAAILOGA MASTER'S  
I MALUA 2022**

Ua molimauina pea le tele o atina'e eseese e atagia ai le aga'i pea i luma o le Ekalesia. O se tasi o laasaga tāua i le Kolisi Faafaifeau i Malua, o le faatinoina lea o a'oa'oga ma su'esu'ega mo le faailoga o le Matuaofaiva, le MASTER'S degree. O lenei mataupu ua leva ona pasia e le Fono Tele e ala i le faatofalaiga a le Komiti o Malua. Peita'i ona o nisi o mafuaaga tataua, na ala ai ona toe faapafala teisi. Lenei la ua tuuina mai e Tama o le Ekalesia le mōlī lanu meamata, e ala i la latou fonotaga talu ai. Ua faamaonia mai e le Failautusi Komiti Malua, susuga Leaso Tupa'i FT, o le tausaga fou 2022 pe a aulia i le alofa o le Atua, o le a amata ai le polokalame mo lea faailoga o le Master, e faaopopo i isi faailoga o loo i ai nei - Diploma of Theology, Bachelor of Theology ma le Bachelor of Divinity.

Ua a'e lenei faautautaga a le Komiti mamalu, ina ua mae'a sailiiliga uma i soo se itu e aafia, ma ua faamafanafanaina i le tulaga maualuga ua i ai le Faletusi a le Kolisi Faafaifeau, e gafatia ai su'esu'ega a A'oa'o ma soo se tasi e fia ausia lea faailoga. Ua faapea foi ona lelei tapena ana fesootaiga faatekonolosi mo su'esu'ega i puna'oa mo lea lava faamoemoe. A e sili ona faamafanafanaina i agavaa ma tomai o le mamalu o Faia'oga ua faamoemoe mo le a'oa'oina atu o mataupu eseese mo lenei faailoga. Ua toatele lupe faalele a le Ekalesia o loo galulue faia'oga i le Kolisi Faafaifeau Malua (e ese mai ia latou o loo tausii nuu), ua i ai o latou faailoga faa-foma'i (PhD) o mataupu faaleTusi Paia. Ua faapea foi ona i ai le faamoemoe mo se tasi o alo talosia a le Ekalesia sa faasikolasipi ma o loo galue i le Kolisi Faafaifeau a le Pasefika i Fiti, le susuga Dr. Fatilua Fatilua e auai mai e lagolago ma tautua le Ekalesia e ala i lenei laasaga tāua.

Ua faataatia e le Komiti o Malua, le fua faatatau talafeagai mo i latou e faamoemoe mo lenei faailoga, e fuafua lava i le agavaa, le malosi ma le maualuga o Tusi Pasi ua ausia e soo se A'oa'o. Ua faamaonia foi le avanoa ai o le au faigaluega Faifeau ma A'oa'o tausii nuu ma nofo aiga, e maua le avanoa ma gafatia le tau, e a'oa'oina ai mo lenei faailoga. O le susuga Dr. Vaitusi Nofoaiga FS ua aveia nei ma Pule o le Kolisi Malua, e sui tulaga i le susuga Maafala Lima FS ua valaauina e aveia ma faifeau o le EFKS Otara, a o le susuga Makesi Neemia FS, ua filifilia i le tofiga o le Sui Pule o Malua. Ia faamanuia le Atua.

---

**AU FAILAUGA  
SULU SAMOA 2022**

- |             |   |   |
|-------------|---|---|
| 1. Ianuari  | - | Irenio Tagaloa FS<br>EFKS Eva<br>VAIMAUGA                     |
| 2. Fepuari  | - | Talalelei Tuafafo FS<br>EFKS Mulinuu<br>APIA                  |
| 3. Mati     | - | Tavita Maliko FS<br>EFKS Lepa<br>LOTOFAGA-LEPA-ALEIPATA       |
| 4. Aperila  | - | Lafolafo Amituanai FS<br>EFKS Saasaai<br>FAASALELEAGA         |
| 5. Me       | - | Steven Palala FS<br>EFKS Salesatele<br>FALEALILI-SAFATA-SIUMU |
| 6. Iuni     | - | Tunupopo Patu FS<br>EFKS Leulumoega<br>AANA                   |
| 7. Iulai    | - | Vaegaau Liko FS<br>EFKS Upper Hutt<br>LAUMUA O AOTEAROA       |
| 8. Aokuso   | - | Petaia Tuifao FS<br>EFKS South Side<br>KUIINISELANI           |
| 9. Setema   | - | Enefatu Lesa FT<br>EFKS Tanoaleia<br>VAIMAUGA                 |
| 10. Oketopa | - | Solomona Ta FS<br>EFKS Maasina<br>APIA I SASA'E               |
| 11. Novema  | - | Penaiia Koro FS<br>EFKS Saleaula<br>ITUOTANE                  |
| 12. Tesema  | - | Faitoaga Tolua FS<br>Faatonu Sulu Samoa<br>OFISA TUTOTONU     |



---

## MŌLĪ LANU MŪMŪ & LANU LAU'AVA

### 1. *"A ua lē mafai le Agaga ona latou o."* *Gal. 16.*

I le gagana faa-femalaga'iga i luga o auala tetele, pe afai e tuuina atu e le Atua se mōlī lanu lau'ava, e tatau ona e alu loa. A e afai e tuuina atu e la se mōlī lanu mūmū, o lona uiga o loo Ia taofi ia te oe. *"<sup>6</sup>Ua mavae ona latou ui ane i Ferukia ma le nuu o Kalatia, a ua vaoia e le Agaga Paia, 'a ua latou te tautala i le upu i Asia; <sup>7</sup>ua oo foi i latou i Musia, ona taumafai ai lea e i latou ona o atu i Pitunia; a ua lē mafai le Agaga ona latou o. <sup>8</sup>Ona ui faatafatafa ane lea o i latou i Musia, ua oo ifo i Teroa. <sup>9</sup>Ua iloa foi e Paulo le fa'aaliga i le po; o le tasi tagata Maketonia ua tu mai, ma aioi mai ia te ia, ua faapea mai, "Sau ia i Maketonia, ma fesoasoani mai ia te i matou." <sup>10</sup>Ua iloa e ia le fa'aaliga, ona sauni loa lea o i matou e o atu i Maketonia, ua manatu lava i matou, ua valaauina i matou e le Alii e folafola atu le Tala Lelei ia te i latou." O le tuana'i ai o le tele o mōlī lanu meamata na faa'emo faasolosolo e le Atua ia Paulo, na Ia tuuina atu ai le mōlī lanu mūmū. Aisea?*

- (i). *E le'i talafeagai le taimi.* E tatau ona alu muamua i ai Apolo e faataatia le faavae o le galuega.
- (ii). *Sa mana'omia e le Atua Paulo ma Panapa i isi magāala – o isi itu o le galuega.*
- (iii). *Sa mana'omia le faaleleia faa-auupegaina atili o i latou, a e le'i faasaga atu i lea misiona tele ma le tāua.*

Ua faamamafa mai le 'emo'emo malosi o le mōlī lanu mūmū – *"a ua vaoia e le Agaga Paia..a ua lē mafai le Agaga..."* O le saga faamautinoa mai! O le alofa tele o le Atua e lavea'i mai ai oe ne'i e lavea ma afaina i au fuafuaga faivavale.

Fai mai le alii faifeau Kanata o AB Simpson, "E masani lava ona leai se mea e sili ona faaleAtua, nai lo le leai o se gaioiga tatou te fai; po o le leai o se mea e sili ona mata'utia lona afaina, nai lo le tatou soona fia sogasogā, auā ua uma ona folafola mai e le Atua le faataunuuina o Lona finagalo paia."

Mata o loo fetalai mai le Atua ia te oe i lenei taimi, *"<sup>10</sup>Ina soia, ma ia outou iloa o a'u lava o le Atua; e viia a'u i nuu ese (i lenei tulaga). Sala. 46.*

E ao ona mataala ma usita'i i le mumū mai o mōlī!

### 2. *"<sup>8</sup>Ou te a'oa'o ia te oe, ma faasino ia te oe i lea lava ala e te savali ai; ou te faatonu ia te oe, ma ou vaai ia te oe."* Sala.32.

O le naunautaiga o le alii o Viniseni mo le galuega tāla'i na ta'ita'iina ai o ia mai Holani se'ia oo i maina e 'eli ai koale i Peleseuma, o nofoaga na ia lauga atu ai ma folafola i tagata 'eli koale, na ia fafaga i tagata matelāina, ma alofagia ai o ia e tagata ua pele i o latou loto. Sa faatumulia lana Aulotu i le toatele o i latou sa fiafia e iloa atili Iesu. Peita'i e le'i fiafia ai i latou o faaululuga o le Ekalesia, ona sa fa'aaogā e Viniseni lavalava ua tia'i e isi tagata e 'ofu ai, sa nofo o ia i se faleo'o, ma foai atu lona totogi i isi tagata. "Ua sili atu ona leaga le tulaga o loo e i ai nai lo i latou o loo e a'oa'o'oina," o la latou tala lea.

"Pe mata e lē o le mea foi lea e ono fai e Iesu?" o le fesili atu lea a Viniseni.

E le'i talia e ona ta'ita'i le manatu o Viniseni, ma latou faate'a ese ai o ia mai le galuega tala'i. Sa tiga tele ma faamanu'alia lona loto. O lona fatu atoa o le fausia o se Ekalesia, ma faatū se Lotu e viia ai le suafo o le Atua, a e aiseā ua lē faatagaina ai o ia e le Atua e fai? O se tasi aso na ia vaaia ai se alii 'eli koale matua, o punou ma le tigaina i lalo o le avega mamafa o lana uta o tau'ave. O se vaai na faaosofia ai Viniseni, ma na ia amata ai ona valivali le ata o le tamaloa o loo punou. E ui ina e le'i lagonaina e Viniseni i lea taimi, a e ua na maumautia lona valaauina moni. O le faifeau talavou sa teena e lana Ekalesia, mulimuli ane sa avea ma tusiata/valiata ta'uta'ua o le lalolagi e manatua pea i tupulaga e tele – Viniseni vani Gogo (Vincent van Gogh).

Fai mai Tavita, *"<sup>2</sup>Sa i lo'u loto e faia se fale e tumau ai le atolaau o le feagaiga a le Alii, o le mea e tu ai aao o lo tatou Atua, na uma foi ona ou sauni e fai ai; <sup>3</sup>a ua fetalai mai le Atua ia te au, 'E te lē faia se fale mo lo'u igoa...<sup>6</sup>o Solomona lou atalii, e faia e ia lo'u fale ma o'u lotoā." I Nofo.28.* Pe afai e tuuina atu e le Atua se mōlī lanu mūmū, e ao ona e mataala ma usita'i i ai. Pe afai foi Na te tōloa au fuafuaga ina ia faataunuu muamua mea e finagalo ai o Ia, tau ina e vivii ma valaau 'Aleluia!

Na tusia e FB Meyer: 'O e i ai i faigata faasino i lou ala? Alu i le Atua... e te maua le faasinoga mai le malamalama o Lana soisoi, po o le faauli o Lona musu... Faatali iinā i le filemu ma le faanaunau, e ui ina si'osi'omia oe i taimi uma i le finau mo se faai'uga

---

vave po o se gaioiga – ona faailoa manino mai lea o le finagalo o le Atua.’

### 3. *“<sup>21</sup>O le ala lava lenei, ia outou savavali ai.” Isa.30.*

Sa taufaifai se tasi tagata, ‘Ina ua folau ese atu le alii saili malo o Kolumopusi, sa ia lē iloa le mea e alu i ai. Ina ua taunuu o ia, na te le’i iloa po o fea lea nofoaga ua i ai. Ma ina ua ia toe taunuu i lona aiga, na te le’i silafia po o fea sa i ai.’ Tatou te mana’omia uma le fesoasoani ia iloa le faasinoga po o fea le itu tatou te aga’i i ai; e tatau pe leai foi ona toe suia le nofoaga, pe talafeagai ona fai lea feau ma lena galuega, pe lelei ona auai i lea faiga paaga pe leai foi, ma isi faasinoga eseese. O le tala fiafia! E faasino atu e le Atua ia te oe le tali ma le ala e te uia, ma pe afai e sesē le itu e te sē i ai, na te toe faasa’o foi le ala mo oe. Ma o auala nei e tolu na te faia ai:

(i) *E ala i fautuaga atamai.* E i ai nisi tagata sa alaala muamua i le mea o loo e nofo ai nei: *“<sup>7</sup>Ia outou fa’aa’oa’o i lo latou faatuatua, ma ia mafaufau i le i’uga o a latou amio.” Epe.13.* O faalētonu lau pisinisi ma au atina’e? E fautuaina lou talanoa i se fai pisinisi atamai o loo manuia lana taumafaiga. O e fetaia’i ma ni faafitauli i fesuiaiga o le soifuaga faa tagata matua? Ia fesili muamua mo se fesoasoani ma fautuaga, a e te le’i faia se faai’uga e te toe salamō mulimuli ai. O la Solomona, *“<sup>15</sup>O le ala o le vale, ua tonu lea i lona manatu; a o le ua faalogo i le pule, e poto ia.” Faata.12.*

(ii) *E ala i le tatalo ma faalogo mo Lona si’ufofoga.* Ua fetalai mai Iesu, *“<sup>27</sup>O a’u mamoe e faalogo mai i latou i lo’u leo, ua ou iloa foi i latou, ua latou mulimuli mai foi ia te a’u.” Ioa.10.* A ua tusia e Isaia, *“<sup>21</sup>O le ala lava lenei, ia outou savavali ai.” Isa.30.* O le ituaiga faamaoniga ma faamalosi’au lena e te mana’omia. O le mea lea, *“<sup>6</sup>Aua ne’i popole outou i se mea e tasi, a ia faailoa atu o outou manao i mea uma lava i le Atua, i le tatalo, ma le faatoga, atoa ma le faafetai.” Fili.4.*

(iii) *E ala i Afioga paia a le Atua.* Fai mai Paulo, *“<sup>16</sup>Ia nofo le afioga a Keriso i totonu ia te outou ia tele lava.” Kolo.4.* Fai mai se tasi tusitala: ‘O le Tusi Paia i le Atua, e pei o le totini i le foma’i tipitipi. Na te faamaulu e ui ma auala mai ai o Ia, ina ia pa’i mai ma tagofia o tatou tagata loloto i totonu.’ Peita’i o lona uiga, o le faitau i ai, talitonu i ai, usitai ma galue i ai.

### 4. *“Ona mulimuli atu ai lea o mamoe ia te ia, auā ua latou iloa lona leo.” Ioa.10.*

A o itiiti le tama o Samuelu ma galue ai i totonu o le malumalu, na te le’i maitauina le siufofoga o le Atua (*le lanu o le mōlī*) ina ua Ia valaau ma talanoa ia te ia. Peitai mulimuli ane ina ua avea ma perofeta, sa avea ona fofoga, o taliga ma mata, ma faitoto’a e auala mai ai le siufofoga o le Atua i le malo atoa o Isaraelu. O le mafai ona maitauina o le siufofoga o le Atua e lē o se mea faigofie, e lē itiiti foi le taimi e alu ai i lona a’oa’oina ina ia silafia lelei ma maumautai. Aisea? Auā e fetalai mai o Ia ia i tatou i taimi eseese, i auala eseese, i si’osi’omaga eseese.

O le maitauina o le siufofoga o le Atua:

(i) *E manaomia ai lo tatou matutua faaleagaga.* Ua fetalai Iesu, *“<sup>4</sup>Pe a tuuina atu e ia ana lava mamoe, e muamua atu ia i ai; ona mulimuli atu ai lea o mamoe ia te ia, auā ua latou iloa lona leo.” Ioa.10.* E faamamafa lona fetalai faasino i ana mamoe matutua, a e lē o tama’i mamoe, e faalogo i lona siufofoga. O tama’i mamoe e mulimuli i o latou tina mamoe matutua, se’ia oo ina lelei ma a’oa’oina la latou faalogo/vaai. O lona uiga e i ai le alofa tunoa mo i latou e le’i matutua, e le’i malolosi ma atoatoa lelei faaleagaga. Pe afai e le’i malosi lau faalogo ma le vaai faaleagaga, e galue mai pea le Atua se’ia oo ina atoatoa ma lelei.

(ii) *O lona uiga ia ‘aua le faatapula’aina i lou olaga talu ai.* Ina ua fetalai le Atua ia Mose, ona lūlūina lea o mauga; peita’i sa Ia fetalai ia Elia i le leo filemu ma le itiiti. ‘Aua e te faatapulaaina le Atua, ‘aua foi e te taumafai e ‘fika’ le Atua. E mafai ona fetalai atu le Atua ia te oe e ala i lau Tusi Paia, e ala ia te i latou ua agavaa e a’oa’o ma lauga lana Upu, e ala i pese ma viiga, e ala i se to’atūgā ogaoga, pe auala mai foi i ou manatunatuga ma manaoga pe afai e te matuā tuuina atu ia te Ia. O le kī atoa e tatala ai, o le faalatalata i le Atua ma taula’i lau vaai i mōlī na te faasino mai.

(iii) *O lona uiga ia usiusita’i.* Fai mai Tavita, *“<sup>8</sup>Lo’u Atua e, ou te fiafia e fai lou finagalo.” Sala.40.* Pe afai e te oo i le maitauina o le siufofoga o le Atua ma Lana faasinoga mo oe, o le ā lau tali atu? E te fai atu, ‘O le a faapena ona fai pe a ou avanoa’?, ‘O le a fai pe afai e talafeagai’?, ‘Se’i o’u mafaufau i ai’? Ia faitau ma manatunatu mai i le mau lenei: *“<sup>11</sup>Afai latou te faalogo ma auauna ia te Ia, ona faauma ai lea o latou aso o manuia, ma o latou tausaga o fiafia.” Iopu 36.*

---

# O LE PEROFETA MULIMULI

*(O le Tala Faa-fagogo ua faaSamoaia mai le tusi 'The Last Oracle' tusia e James Rollins)*

## Mataupu III

O Aso Nei

Setema 5, 1.38 pm

Uosigitone, Itumalo o Kolumopia.

E lē o aso uma e pa'ū ifo ai se tagata oti i ou lima. Na savalia e le Ta'ita'i Karai Piesa le Maota o le Malo ae faafetaui ane o ia e se tamā maumausolo e leai se 'āiga. O Karai sa lē o sagatonu lona mafaufau, ona ua uma ona faiaina i lana fusuaga muamua, a o lea foi e alo atu mo le isi. O le vevela o le aoauli sa na o le faaosoina o lona itaitagofie. Na fa'aafu le aso i ofu vevela masani o le laumua, ma faatafa ane ai i le itu o le auala. I lona ofu lanu moana vaivai sa la'ei i fafo o lona mitiafu lē faamauina ma lona ofuvae, na ia fuafuaina lona vevela i totonu ua siitia mai le feoloolo i le matuā vela lelei.

Mai isi poloka e lua na iloa atu ai e Karai se tagata o loo tu ma talotalo mai ia te ia. O le maumausolo sa la'ei sona ofuvae sa afe i luga vae gata i tapuvae, na iloa atu ai seevae 'ami tuai, sa nonoa faa'afa. Sa faapupu'u i totonu o se ofu mafanafana maanuminumi. A o latalata mai le tamaloa, na maitauina e Karai lana soesā o loo ma'osiosia i le lanu efuefu, ma ona mata pei e fulafula ma mū a o ia vaavaai solo.

E lē o se vaaiga e faate'ia ai le i ai o tagata 'aisi i le lotoā o le Maota o le Malo, ae maise o lea faato'ā uma atu aso malolō o le Leipa i le faai'uga o le vaiaso talu ai. Ua toe foi atu tagata tafafao asiasi mai i o latou olaga masani, o malu o le malo mo le puipuia o solo tete'e ua mapu atu i fale kalapu, ma tagata faamamā aai ua uma ona latou aveesea mea e ave ma molimau. O i latou na mulimuli tu'ua le aai o ē na soona saili pea i ni siliva e ono to'ulu ma paepae ai i ta'eta'ei o le auala, saili solo i kalone lapisi mo ni apa inu, e pei o pa'a latou te faatama'ia ni aano totoe mai ponaivi ua leva.

E le'i 'alo ese Karai mai le maumausolo a o ia alu atu mai le auala o Sefesone agai i le Olo o Simifisone, o lona taunuuga fuafuaina lea. Na ia fesoota'i foi lana vaai i mata o le tamaloa, ina ia mautinoa o loo saogalemu itu uma, ma ia faamaonia lona i ai. E i ai i latou e faia lenei amio o le 'aisi ona latou te manaomia se fesoasoani, a e o le toatele o alii ma tamaitai o loo i luga o auala e mafua ona o puapuagā o le olaga, o le faapologaina e le mana'o pea o le tino, po o isi ituaiga gasegase o le mafaufau. O le toatele o i latou

nei o fitafita sa i totonu o le militeri. Na musu Karai e tepa ese – atonu o le mea lea na mata fiafia mai ai le tamaloa.

Na faitau e Karai foliga fefiloi o le mapusaga ma faamoemoega i totonu o le elelea ma le maanuminumi. Ina ua ia iloa atu Karai, sa faasolo loa ina mautū lelei le savali maluelue solo a le maumausolo. Atonu sa i ai lona popolega ina ne'i sola lana maa i totonu o le Maota ae na te le'i taunuu atu i ai. Na gatete uma vae ma lima o le tamaloa. Sa manino mai lona tautevateva pei e onā, pe aafia mai se inuga 'ava oona.

Ua aapa atu se lima ia te ia, o le alofilima mafola.

O se faailoga iloa lautele i le lalolagi – mai 'autu o Paresila i nofoaga mauualalo o Panikako.

Fesoasoani mai. Faamolemole.

Sa tago ifo Karai i totonu o lona peleue mo lana ato. E toatele sa manatu o ia o se tagata faavalea gofie i faiga a tagata aisi. Na o le faatauga o pia poo fualaa oona e fa'aaogā i ai. E le'i kea i ai Karai. E le o ia se faamasino. O le tagata soifua lenei tamaloa ua manaomia se fesoasoani. Na ia to mai i fafo lana 'ato tupe. Pe afai e fesili atu se isi, na te ave i ai. O lana lea faiga masani. Ma pe a tuu lava i se tulaga faamaoni i luga atu, o lenei faiga agalelei, ua fetau lelei foi mo Karai, o se pulu pasama o le alofa faatagata e faamālū ai le agasala o loo tanumia loloto ifo na te lē fia vaai i ai.

Ma e na o le pau lona tau o sina siliva e tasi pe lua. E lē o se fefaatauaiga leaga foi.

Na ia tepa ifo i lana ato. Na o pepa ta'i luasefulu tālā. Faato'ā uma ona tala lana tupe i le masini. Na faamimigi ona tau'au ma to ane i fafo le tupe o i ai le ata o Aneterū Siakisone.

Ia ua lelei, o nisi foi taimi e sili atu le tau nai lo se tupe siliva e tasi pe lua.

E ea a'e i luga lona ulu ae fetau loa ma le taunuu ane o le tamaloa. Na aapa atu le lima o Karai o loo i ai ma le luasefulu talā pepa ae iloa e lē o avanoa le lima o le tamaloa. I le ogatotonu o lona alofilima na taatia ai se tupe siliva tuai mā'omo'omo, e pei lona lapo'a o se siliva limasefulusene.

Sa faanunumi le muaulu o Karai. O se taimi muamua lenei ua taumafai ai se tagata maumausolo e totoi o ia.

Ae le'i manino lelei Karai i le mea o loo tupu, ae sulu atu le tamaloa ia te ia, e peisea'i ua faafuase'i



---

ona tūlei atu e se isi mai tua. Na matala lona gutu e pei o loo ta'u mai le mata'itusi o le O i lona te'i. Na ia pa'u atu i luga o Karai, sa vave ona tago ane e pu'e ma sapo le tamaloa matua.

E māmā atu nai lo le manatu sa ia Karai. I lalo ifo o lona peleue, o le tino o le tamaloa ua pei na o ivi, o le auivi ua laei i le peleue. Ua tago atu le lima e olo le alafau o Karai. Sa matuā vevela i le mu. O se 'emo o le fefe-o se faama'i pipisi, se faama'i oti - na lagona e Karai, peita'i na te le'i tuu ese le tamaloa o loo ua galemu i ona lima. A o ia tauamoina pea le tamaloa, na ia sui atu lona lima agavale ma faataamilo i lona ua. Na pa'i atu lona lima ma tago i se faaputuga e vevela toe susū i le pito i lalo o le ua o le toeaina. Na tafe soloi mai i ona tamatamailima.

O le toto.

Na minoi Karai e tusa ma lagona o ona musele. Na ia sese'e ifo ma taavale i le itu, faapa'u ese mai le ala savali, a o taofi mau pea le tamaloa i ona lima. Na fesoasoani le vao mafiafia e talitali lo la'ua pa'u'u ifo.

E le'i lagona e Karai le pa'ō o isi pulufana ae sa ia iloa atu le fe'emo mai o pulu sa toe fitifiti ese mai le mea sa tu ai o ia. E le'i toe tu Karai, ae taavale pea se'ia oo ina tau atu i se faailoilo u'amea ma faasimā sa i totonu o le lotoā o le Olo o Simifisone. Na tu maualuga pau mai le sulugatiti. Na la'ua faapupu'u ai i tua o le faailoilo ma le toeaina. O le faailoilo o loo faailoa ai: NOFOAGA TUTOTONU MO FAAMATALAGA I LE OLO O SIMIFISONE.

E manaomia mo'i lava e Karai ni faamatalaga.

Faamatalaga e pei, o ai le tagata o loo fia fasioti ia te ia.

Sa tu le faailoilo i lo la va ma le Maota. Sa avea ma talipupuni lē tumau. Pe tusa ma le sefulu iata le mamao ese, o loo avanoa mai ai faitoto'a faaofuofu i le tasi itu o le Olo Simifisone. O le maota lava ia sa fausia ma ea a'e i luga i fogafale ma 'olo o maaoneone lanu mūmū, na 'eli uma mai tuāmaota o Seneka, Merilane, o se 'olo moni o le ituaiga Nomani. O lona faamalumu e avea ma puipuiga na ofoina mai ua na o ni nai sitepu le mamao ese, peita'i o le taumafai e kolosi atu i ai i le taalaelae, o le a faailoa atu ai i la'ua i se tagata o loo lafi ma sana fana.

Nai lo lona, na se'i a'e e Karai lana tama'i fana- o le ituaiga Sig Sauea P229 - mai lona faamoega i lona tua. E lē ona ua i ai se tasi ua ia faamoemoe e fana. Ae sa ia taofi mau pea ma sauni ina ne'i i ai se tasi e osofa'i mai.

I le itu autafa o Karai, sa ōi ane ai le maumausolo aisi. Na lilofia atoa lona ua i le toto. Na gugulu Karai i le misialofa i mala faasolosolo o si ona olaga. Talofa i lenei tagata puapuagatia na sau e saili sina mea e ola ai, ae ua na o le pulufana i lona papatua le mea ua maua, o se puapuagā le'i mafaufauiina i le taumafai o nisi e faao'o le oti ia Karai.

A o ai sa taumafai e fasioti o ia? A e aiseā?

Na taumafai le tamaloa e sii a'e i luga lona lima ua gase ae lē mafai a o ia tau manavanava. E fua atu i le itu tonu na laveia i le pulufana ma le tele o le toto ua masa'a e iloa ai ua lavea lona fatuga'o, o se manu'a ogaoga mo se tagata ua matuā vaivai. Na pa'i ane le tamaloa i le suilapalapa o Karai. Na faamatala ona tamatama'ilima ma faapa'u ese le tupe siliva māomi'omi sa ia taofia. Lea sa ia matuā 'u'umauiina. Na pa'u ifo le tupe tau i le vae o Karai ma taavalevale atu i luga o le mutia.

O se meaalofo taumavae. O sina agalelei toe faafoi mai.

Ua uma ona fai lea gaioiga, ona gase ai lea o lima o le tamaloa. Na pa'u atu lona ulu i luga o tau'au o Karai. Na tomumu ma upuvale lēmū Karai ia te ia lava. Talofa e, malie oe toeaina.

Na aapa ane le isi lima o Karai e saili ma maua lana telefoni. Na tatala ma oomi le ki mo faalavelave faafuase'i. E le'i pine ae tali mai. Na tautala topetope Karai, ma valaau ai mo se lavea'i faanatinati i le ofisa tutotonu.

"O lona ua i luga o le ala le fesoasoani," na faailoa mai ai e le faatonu. "O loo maua lelei atu oe i luga o mea pu'eata o le Maota. O loo iloa atu le tele o le toto o loo masa'a. O 'ē lavea?'"

"Leai," o lana tali vave atu lea.

"Ia faatali lelei mai iina, 'aua le alu ese!'"

E le'i finau atu Karai. E le'i toe i ai nisi pulufana. E le'i toe tatagi nisi pulu na taia i le faailoilo. E telē le avanoa ua sola ese le fili sa lamatia ai i la'ua. Ui i lea, sa le'i minoi Karai -se'ia taunuu atu le fesoasoani.

Na toe tuu e Karai lana telefoni i le taga, ona ia tago ane lea i le tupe a le tamaloa i luga o le mutia. O se tupe mamafa, mafiafia na gaosia lelei. Na ia siitia ma tafitafi lona laualuga. Na ia fa'aagā le toto o le tamaloa sa panupanu i luga o lona lima, e soloi ese ai le otaota na i luga o le tupe, ma iloa atu ai se faailoga e peisea'i o se ata o se malumu Eleni po o Roma, e ono pou o loo tu ai lona tauluga.

Tafēfē, o le ā lenei?

---

## O LE PEROFETA MULIMULI...

I le ogatotonu o le tupe siliva sa tusia ai se mataitusi e tasi. Sa faapea ane Karai o le mata'itusi Eleni o le..? Sikima.

I le matematika, o le mataitusi lenei o le sikima o le faailoga e iloa ai le tuufaatasiga o vaega-me'a uma, a e o le faailoga foi o le faalapopotoga o loo galue ai Karai: Sikima, o se Vaega'au Faapitoa o fitafita sa a'oa'oina ma koloni i mataupu faasaienisi, ina ia tautua o se lālā faamiliteri mo le MAAPA, le Matagaluega o Aoaoga Auiluma mo Puipuiga o le Atunuu.

Na vaavaai atu Karai i le Maota. O loo iinei le ofisa tutotonu o le Sikima, o loo tanumia i lalo ifo o faavae o le Olo o Simifisone i fale sa fausia i le Taua Lona Lua o le Lalolagi. Sa faatū fuafuaina lelei ina ia talafeagai ma fetau lelei lona tulaga ma le maota o le malo, le Penetakona, ma isi fale su'esu'e o le malo ma tagata taitoatasi.

Na toe pulato'a ane Karai i le tupe, ma iloa faafuase'i ai lona sesē. O le mataitusi e lē o se faailoga Eleni, ae ua na o se mataitusi lapo'a o le E. O lona atuavale, na faasesēina ai o ia e ona mata, na ia vaai ai mea na muamua oso a'e i lona mafaufau.

Na ia 'u'u mau le tupe ma tapuni lona lima.

Ua na o se E.

E lē o le taimi muamua lenei i nai vaiaso ua tuana'i sa talia gofie ai e Karai sootaga e le'i i ai - o le manatu taatele lena i ona uso faigaluega. Mo le masina atoa, sa saili ai e Karai se faamaoniga o loo soifua pea lana uo ua leva ona leiloa, o Monike Kokalise. Ma e oo mai nei, e ui ina tele le lagolago ma fesoasoani mai a le Sikima, e leai se taunuuga lelei.

O le tuliga ma aitu, sa lapata'i mai ai Penita Koloue i le mae'a ai o vaiaso muamua.

Atonu o le mea tonu lea o loo ia faia.

I le isi itu auala, na patatū matala ai faitoto'a i luma o le Olo. Na feosofi mai i fafo ni tagata la'ei uli pe to'a sefululua, ma a latou auupega o loo faalālā, sa to'otutuli soso'o ta'ito'alua.

O le vaega'au fesoasoani.

Na latou gaiou ma le faautauta, ae leai se tasi na faapā sana fana.

Na taunuu vave ane ia Karai ma puipui loa i la'ua ma le tamaloa.

O se tasi o latou na punou ifo i tafatafa o le tamaloa ma mausolo. Na taatia ese lana faafafa o togafitiga, ua sauni o le a fai le auaunaga lavea'i.

"Ou te manatu ua alu o ia," o le lapata'i atu lea a Karai.

Sa tago ane le auauna faafoma'i e siaki le uaua, ma faamaonia ai le tala a Karai. Ua maliu.

Na tu i luga Karai. Ua te'i i le vaai atu i lona ta'ita'i o Penita Koloue, i le faitotoa i le itu o le fale. E leai se peleue, ma lima o lona ofu o loo afe i luga, foliga o Faatonu Koloue a o ia tautulei atu i le faitoto'a. Sa pei o le agi a le afā ona foliga. E ui ina e sefulu tausaga e matua ai ia Karai, ae sa gaiou lava Penita e pei o se luko masomasoa. Mata sa maitauina mai e le faatonu e lē ogaoga tele le tulaga sa i ai. A lē o lena, atonu sa pei o Karai, sa manatu ua sola ese faataalise le fasioti tagata sa taumafai e tagatavaleina o ia.

Fai atu foi, o le ā le mea e le'i malamalama i ai le tamaloa faasino i galuega faaofisa?

Na kolosi atu Penita ia te ia a o faalogoina leo o sailini. "O lea na ou faatonu leoleo e loka le Maota," o lana upu atu lea i se leo fegauia'i.

"Ua laitiiti tele, ua tuai tele."

"E foliga faapenā. Ui i lea, o le a tulimata'i e pu'eata faatonutonu le auala na uia. E fua i le itu na sau ai pulufana. Sa i ai se isi na mulimuli mai ia te oe?"

Sa lūlū le ulu o Karai. "E leai se isi ou te manatu i ai."

Sa faitau e Karai fetuuna'iga i fofoga o le faatonu a o ia maitauina le Maota. O ai se tasi na mana'o e tagatavaleina Karai? I luga o fasitepu o latou lava faitoto'a? O se lapataiga manino, ae mai le ā? E le'i auai Karai i se gaiouga po o se galuega talu mai le misiona mulimuli i Kamepotia.

"Ua uma ona matou siitia ou matua i se nofoaga e saogalemu ai," o Penita lea. "E sili lava le mao i mea lelei."

Na fiafia Karai i lea faatatau. E ui ina sa ia iloa lelei, na le'i malie i ai lona tamā i lea gaiouga. E sili atu ai foi lona tina. E le'i matuā te'a ese lagona tiga ona o le ave faamalosiā o i la'ua i le lua masina talu ai. O le ogaoga o le mataupu o loo tula'i mai nei, na faasaga ane Karai e mafaufau po o ai lava le tagata sa taumafai e fasioti o ia - ae sili ona tāua, pe aiseā. E tasi le tulaga e ono sa'o ua tula'i mai i luma: o lana su'esu'ega o loo faia i le taimi nei. Mata ua ave'a lana sailiga po o gafea ua oo i ai lana uo, ua afaina ai se tasi?

E ui ina o le maliu ua i ai nei, ae ua totogo a'e le faamoemoe i totonu o Karai.

"Faatonu, mata o le taumafai e tagatavaleina - ?"

Na sii a'e i luga le lima o Penita a o faamanumi ona laumata i le popole. Na ia faatū ifo i le tasi tulivae i autafa o le tamaloa ma mausolo ona liuliu malie lea o ona foliga. Ina ua mae'a sina minute, ona ia toe

---

## **OLE PEROFETA MULIMULI...**

nofo ane lea i ona mulivae ma ona mata ua faapūiti. Ua faateteleina lona popole.

“Lau afioga, o le ā le mea ua tupu?”

“Ou te iloa e lē o oe le taula’iga sa fuafuaina ia lavea, Karai.”

Na tilotilo atu Karai i le auala savali i tafatafa o le auala tele ma manatua le fe’emo solo o pulu i ona mulivae.

“E lē o le taula’iga autū,” sa fa’auau atu ai le faatonu.

“Atonu sa mana’o le tagata fanafana e ave’ese oe ne’i ave ma molimau.”

“E faapefea ona e mautinoa lona mea?”

Na luelue faasino atu Penita i le tamaloa ua maliu.

“Ou te iloa lelei le tamaloa lenei.”

Sa logo i tino o Karai le te’i.

“O lona igoa o Atipale Poleki. Le polofesa o mataupu tau neula o le tagata i le M.I.T.”

Na faaemo atu e Karai lana vaai i foliga sasama o le tamaloa, o le palapalā, o le soesā ve’uve’ua, peita’i sa mautinoa le leo o le faatonu. Afai e sa’o, o lona uiga sa manino le pa’ū o le uso i le laumeavale.

“E faapefea ona oo o ia i lenei tulaga pagatia?” na ia fesili atu ai.

Na tu i luga Penita ma lūlū lona ulu. “Ou te matuā lē iloa. Ua silia ma le sefulu tausaga ma te le’i toe fesoota’i. A e o le fesili e sili atu ona tāua: Aiseā o le a mana’o ai se tagata e fasioti o ia?”

Na faatau pupula Karai i le tino maliu. Na ia toe fetuutuuna’i ana ia lava iloiloga. Sa tataua ona to’afilemu Karai pe a iloa e lē o ia sa taula’i i ai le fasiotiga tagata, peitai afai e sa’o Penita, o lona uiga o su’esu’ega a Karai e leai sona fesootaiga ma le osofaiga.

Ua toe oso a’e foi le ita – faatasi ai ma le manatu e i ai lona tiute e tauave.

Na maliu le tamaloa i lima o Karai.

“E lē taumate sa sau o ia iinei,” sa magamagagū ane ai Penita a o tepa a’e i le Olo. “E vaai a’u. Ae aisea?”

Na sii a’e e Karai lona lima, ma manatua le faanatinati a le tamaloa. Sa taatia pea le tupe siliva anamua i luga o lona alofilima o loo toto. “Atonu sa mana’o o ia e avatu le mea lea ia te oe.”

2.02 i le aoauli.

A o ‘e’ē mai le sailini i le mea mamao, sa savali lemu atu le toeaina i le Auala o Penisilivenia. Sa laei lona suti efuefu pefua. Sa ia tauaveina se ato malaga tuai i le tasi lima, a e ‘u’u le lima o se teine itiiti i le isi ona lima. Na ofu e le teineitiiti iva tausaga le matua se

ofu e pea lelei ma le suti o le toeaina. O lona lauulu uliuli sa nonoa i tua mai lona foliga i se lipine lanu mūmū. O le polesi o ona seevae sa uli sa pisipisia i le palapala ua mago mai le malae sa taalo ai ae le’i pikiina mai o ia talu ai.

“Papa, na e maua lau uo?” sa ia fesili atu ai i le faa Rusia.

Na ia oomi lona lima ma tali atu i le leo vaivai. “Ioe, na ou maua o ia, Sasa. Ae manatua, faa-palagi, lo’u au.”

Na ia tau fetoso teisi ona vae i le otegia, ona toe fai atu lea. “Sa ia fiafia e iloa mai oe?”

Na toe to manatu i tua le toeaina, i le vaaiga na ia iloa atu i le fa’ata o le fana, i le pa’ū ifo i lalo o le tino.

“Ia, sa faapena lava. Sa matuā te’i a o ia.”

“Ta o loa la i le fale? O loo misia mai a’u e Marata.”

“Toe itiiti”

“Toe itiiti afea?” na ia toe fesili atu ai faamatanana ma valualu lona taliga. Na iila mai se uamea i totonu o lona lauulu uliuli i le mea sa mageso. Na tago atu le toeaina aveese le lima o le teine mai lona taliga. Na ia faamolemole lona lauulu i sina pōpō lēmū. “Toe tasi le mea e fia fai. Ona ta o loa lea i le fale.”

Na ia latalata atu i le Auala lona Sefulu. Na mānu a’e i luga le fale i lona itu taumatau, o se pusa matagā na fausia i faaputuga simā sa taumafai se tasi e teuteu faamatagofie i se laina o tagāvai. Na ia faasaga atu i lona faitoto’a. O lona lea faamoemoega e fia taunuu i ai.

Le ofisa tutotonu mo le FPI, le Faalapotopotoga mo Pulega o Iloiloga.

3:46 i le afiafi.

Na gogolo se leo mai totonu o le loka a Karai.

Na ia faatopetope atu i luma, toe itiiti a se’e i luga o le fola o loo susū. Faato’ā uma ona tā’ele, ua na o se solo o loo la’ei i le sulugatiti. Ina ua mae’a talanoaga ma le Faatonu ia Koloue faasino i le faalavelave na tafana ai o ia, na ia solomuli ifo ai i le potu o i ai loka i le vaega pito i lalo o fale o Sikima. Ua uma ona fai le taelega muamua, sosoo ai ma le itula o koleniga mamafa i totonu o le fale taalo i si’isi’iga uamea mamafa – ona toe taele lea. Na fesoasoani tele lea i le tau faato’a lelei o lona mafaufau.

A e le’i atoatoa lelei lava ona lelei. E lē ato se’iloga na te maua ni tali mautū i le fasiotiga tagata.

Na taunuu i lana loka, tago atu tatala le tapuni ma sapo lana telefoni Pelekiperi a o gogolo ma gatete

---

## **O LE PEROFETA MULIMULI...**

mai le fola uamea o le loka. Masalo ai o Faatonu Koloue. E tau maopo atu ona tamatamailima i le telefoni a e uma le gogolo. Ua misi le telefoni. Na siaki atu le lisi o telefoni misia ma lona faa'ū'ū. E lē o Penita Koloue. O le igoa o tusia mai: R. Taraipola. Ua galo nimo ia te ia.

Kapeteni Roni Taraipola o le Fuamanusina a le Malo. O le Kapeteni sa nafa ma le ta'ita'iina o le sailiiliga faapitoa sa faia i le motu Initonisa o Pusato. E i ai lana ripoti e tatau ona taunuu mai i le asō, e faatatau i le toe sisiina a'e i luga o le manua o sa goto, le Manamea o le Vasaloloa. E lua ni vaamaulu sa ia te ia, mo le sailiga o le vaa goto ma ona siosiomaga i le gataifale.

A e o Karai sa i ai lona lava naunautaiga faapitoa i lenei sailiiliga.

O le motu lenei o Pusato, o le nofoaga lea na vaaia mulimuli ai lana uo ma le paaga, o Monike Kokalise, a o toso ifo o ia i lalo i se upega mamafa sa lavelavea ai. Sa finagalo malie Kapeteni Taraipola e saili ane ai le tino maliu o Monike Kokalise. O le kapeteni o se uo mamae ma se tasi na aoga faatasi ma le faletua o Monike, o Kati Paraiano. O le taeao analeilā, na alu ai Karai i le Ofisa Tutotonu o Mataupu Tau Gataifale o le Malo, i Sulani Merilani, ma le faamoemoe na te maua ai se tala. Na teena ma fautuaina o ia, ina ia faatali seia uma lelei le faatalanoaga. O le mafuaaga lena na ia toe faatopetope mai ai iinei, ua sauni e tuliloa faanatinati le Faatonu ina ia uunai malosi le Vaega'au o le Gataifale.

Na tau mūmū foliga o Karai i le lagona tiga peisea'i ua ia lafoa'i lana mataupu sa tulimata'i, ona ia tago ane lea oomi le ki e toe vili ai le telefoni na misia. A o ia faatali le fesootaiga ma le Ofisa Tutotonu Mataupu Tau Gataifale, na ia nofo faapa'ū ifo i lalo i se nofoa, ma faataupupula atu i le loka o i le isi itu faafesaga'i. O loo tusia ai i le peni maka-mea lanu uliuli i luga o se pepa iila pipii, le igoa o lē sa fai mo ia le loka.

**KOKALISE.**

E ui lava ina ua mautinoa ua maliu Monike Kokalise, a e leai se tasi na mana'o e aveese le pepa iila pipii. O le faailoga mo se faamoemoe lē leoa. Pe ana lagolagoina lava e Karai.

Sa i ai lona tiute o loo aitalafu ai i lana uo.

Na siitia faasolosolo a'e Monike i ona tulaga tofi faatasi ma Karai. Na siitia lana uo mai le Fitafita Pulou Meamata i le taimi tonu na aveese ai Karai

mai le falepuipui o Liveniuota, sa taofia ai ina ua ia tu'ia se ofisa sinia a o feagai ma koleniga i le vaega o Leoleo o le Vaega'au. Sa vave ona la'ua masani, osi le faigauō mamae, fai le faiga paaga o se ulugatagata ese i Sikima. O le umi o Monike na o nai inisi e sili ai i le lima futu, ma lana soesā mafiafia faatusatusa ia Karai e umi atu toe pa'e'e lona fuatino. A o le eseese tonu o i la'ua e loloto atu nai lo foliga vaaia. O le amio lē gaoiā faigofie o Monike na faasolosolo lemu lava ona osofaia ai le loto malosi lē fetuutuunai o Karai. Pe ana leai le faigauo ma Monike, ua leva ona alu ese Karai mai Sikima, e pei ona sa ia faia i le vaega o Leoleo o le Vaega'au.

A o faatali lana telefoni, na toe tomanatu Karai i foliga o si ana uo. Na la'ua fuifui faatasi i le tele o lavelave i tausaga e tele. O loo tauave e Monike faailoga o mā'ila ma ma'osi'osia o pulufana e faamaonia ai. Na i'u lava ina leiloa ai le isi ona lima i se tasi o a la'ua misiona, ma toe fai ai lona lima faapipii eletise. A o ia nofonofu, sa ia lagona le 'ata a Monike pei e ouou...po o le mālū o lona leo, e ta'u mai ai le loloto o le atamai faale mafaufau o le tamaloo, ua a'oa'oina lelei i faaitaiga ma mataupu o vailaau ma faasaienisi. E faapefea ona alu ese se tagata maoa'e ma tāua lona aogā? E aunoa ma ni faailoilo e tau saili ma maua ai?

Na toe te'i Karai i le kiliki o le telefoni i lona taliga. "O Kapeteni Roni Taraipola lea," na tali mai ai se leo paū.

"Talofa lau afioga i le Kapeteni, o Karai Piesa lenei."

"Oi, malo lau susuga i le Taitai'au. Sa ou faamoemoe e fesootai atu oe i le afiafi nei. E lē lava so'u taimi avanoa ae le'i faia le isi a'u fonu."

Ua leva ona lagona atu e Karai le leo faanatinati.

"Kapeteni?"

"O le a ta'u sa'o le mataupu. Ua faatonuina a'u e taofi le saililiiga sa fai."

"E ā?"

"Sa mafai ona matou maua tino maliu e luasefululua. O su'esu'ega na iloa ai e leai ma se tasi o i latou, o lau tamaloo."

"E na o le luasefululua?" Tusa lava po o se fua faatatau, o se numera itiiti tele lenei o le aofai o e na maliliu.

"O lea ou te iloa, lau susuga i le Taitai'au. Peitai sa faalavelaveina le sailiga i le loloto tele o le sami ma le mamafa o peau. O le fola o le ogasami e felavasa'i solo ai ana ma paipa faalalava o maugamū, o le tele e faitau fia maila le mamao ma le lavelave."

---

## **OLE PEROFETA MULIMULI...**

“E tusa lava pe o lena, a e...”

“Lau susuga i le Taitai’au.” O le leo o le tamaloa sa mausalī. “Na leiloa le isi a matou tagata mauulu i le lua aso talu ai. O se tamā lelei e i ai lona aiga ma le fanau e toalua.”

Na moeiini mata o Karai, i lona iloa lelei o le tiga o lena faalavelave na tupu.

“Pe afai e saili pea i ana, na o le fasiotia o nisi tagata faaopopo. A e mo le a?”

Sa na o le nofo filemu ma le sālō o Karai.

“Taitai’au Piesa, ou te masalo e te le’i maua se isi tala. E leai nisi feau tusitusia?”

Sa mapuea Karai.

Ina ia ona maua le lagolago a le kapeteni, sa ia ta’ua i ai le feau faauaealesi e tasi sa ia mauaina..pe sa manatu na mauaina. O le mea na tupu i nai vaiaso talu ona leiloa Monike. I le faasologa o sailiga na fai i le motu, na o le pau lava le vaega o le tino o lana uo sa maua mai otaota ma le gasu, o lona lima faapipii, o se galuega mae’ae’a faatekonolosi na fausia e enisinia faapitoa, e aofia ai ma se leitiō uaealesi na pipii ai. A o aveina atu le lima faapipii lenei o Monike i lona toe sauniga, na femigoia’i tamatama’ilima ma tātā se feau faa-uaealesi Lavea’i Mai, e ui ina vaivai ma tau lē lagona. Na o nai sekone lava na lagona ai – ma na o Karai na ia lagonaina. Ona toe pe lea. Na su’esu’e ma siaki e inisinia eletise le lima faapipii ma fai le faaiuga, e leai se faailoga o se feau uaealesi na lafo mai, atonu sa na o se pa’ō. Ua na o se masofa ua malepe. E leai se isi tulaga iloga. O se aitu i le masini eletise.

Ui i lea, e le’i fiu ai Karai, e le’i uma lona faamoemoe, e ui ina mavae le faitau vaiaso.

“Le Ta’ita’i’au?” Na fesili mai ai Taraipola.

“E leai,” na ta’utino atu ai Karai ma le fa’atu. “E leai se isi tala na maua mai.”

Sa faatali teisi Taraipola, ona ia toe fai atu faagesegese lea. “Ou te manatu la ua oo i le taimi e faataatia ai loa lea mataupu, lau susuga i le Taitai’au. Mo le lelei o tagata uma.” Na lagona le mālū teisi o lona leo. “Ma le isi, e faapefea Kati Paraiano? Le faletua o lau uo. O le ā sana tala i nei mau suesuega?” O se tulaga oona lea o lenei mataupu. Na moomoo Karai ana iloa e lē faailoaina ia Kati. Ae faapefea ona ia nanāina mai ia te ia? O Monike o si ana tane; sa i ai si a la’ua tama teine, o Penelope. Ui i lea, atonu o se mea sesē lea sa fai. Na faalogologo Kati ma foliga lototele a o faamatala atu e Karai ia te ia. Na tu sasa’o o ia i ona la’ei uli mo le toe sauniga, o

ona mata e faatumulia i le faanoanoa aati. Na ia iloa ua na o se laina manifinifi tau le soifua, ua na o sina faamoemoe faanenefu. Sa ia vaai atu ia Penelope a o nofo mai i le nofoa o le limosini uliuli, toe vaai atu ia Karai. E leai se upu na ia faia, na o le luelue tasi o lona ulu. Na te lē gafatia ona ‘u’u lena laina manifinifi tau le soifua. Na te lē lavātia le toe leiloa atu o Monike mo le taimi lona lua. O le a faataugāina ai o ia, o loo feagai ma lenei ma’ale’ale. Ma sa i ai foi ma Penelope e tataua ona manatu i ai, o lana lea vaega o Monike. O le tino, toto ma aano moni. E lē o se faamoemoe faaleaitu.

Sa ia malamalama. O le ala lea na fa’auau ai ana ia lava su’esu’ega. E le’i toe talanoa ia Kati talu mai lena aso. O se maliega mautū lē leoa i lo la’ua va. Sa le’i mana’o Kati e toe faalogo atu ia te ia se’i iloga e maua le iuga mautū o le mataupu, i le tasi auala po o le isi. O le tina o Karai, na tele afiafi sa latou faatasi ai ma Kati ma le pepe. E le’i silafia faatasi e lona tina se mea e uiga i le fe’au faa-uaealesi mo se lavea’i, peitai sa ia masalosalo lava e i ai se mea o loo tupu ia Kati.

E malu’ia, o le upu lea e faamatala ai e lona tina le mea o loo tupu ia Kati.

Ma sa iloa e Karai le mea sa malu’ia ai Kati.

O le a lava le faai’uga na fai e Kati i lena aso, ua ia maumautai lena laina o le olaga. O mea e taumafai le mafaufau e tuu ese, e lē mafai e le loto. Ma o loo ia faataugāina o ia.

Mo lona lelei, mo le aiga o Monike, na mana’omia ai e Karai lona faafesaga’i ma le sauā o le mea moni. “Faafetai tele mo lou tautigā, lau afioga i le Kapeteni,” sa memumemu atu ai Karai mulimuli ane.

“Sa e faia le mea sa’o a o lua faatasi ma lau uo, lau susuga i le Taitai’au. Ia e silafia le mea lena. Peitai e i’u lava ina tatou faasolo pea i luma.”

Na tau faalaolao e Karai lona fa’a’i. “Faamaise atu i le maliu o si au tamaloa, lau afioga.”

“E faapena foi ia te oe.”

Na motusia e Karai le fesootaiga. Na ia tu i luga ma fai sana mānava umi. Mulimuli ane, ona ia savali atu lea i le isi itu i le loka o la fesaga’i, tuu ai lona alofilima i luga o lona mafolafola, ua mālūlūina pei se tuugamau. Ia malie lou loto, oe le uō.

Na ia aapa atu, toso le pito o le pepa iila pipii, ma sasae ese atoa.

Ua i’u le sailiga aitu a Karai.

Tofa soifua, Monike.

*(Sosoo atu Sulu Novema 2021)*

## MEA 'AI TATAU MA LE ASO

### Ia faula'i ia te outou lenei mea alofa

*"O lenei, e pei ona faula'i o mea uma ia te outou, o le faatuatua, ma le upu, ma le iloa, ma le filigā uma, atoa ma lo outou alofa mai ia te i matou, ia faapea foi ona faula'i ia te outou o lenei mea alofa."* 2 Kori.8. O le ā le mataupu, le mea alofa lea o loo tautala i ai le aposetolo iinei? O le matamau po o le foa'i atu! E le'i valaauina oe e le Atua e avea ma faatānoa e teu ai ana faamanuiaga mo na o oe, a e ia avea o se vaitafe e faatafe atu ai ona manuia i isi tagata. E toatele Kerisiano ua popoto ma a'oa'oina lelei pe faapefea ona maua mai, a e lē o le tuuina atu. Pe afai e avea oe o se tasi o Kerisiano aumai, e aunoa ma le ola o se Kerisiano avatu, o le a magumagu lou ola faatuatua ma i'u ina pala ma mate ai i luga o le vine.

E lua ni sami i totonu o Palesitina, e fafaga uma e le Vaitafe Ioritana. O le tasi sami e fou pea, ma faatumulia i le ola. E tele i'a ma figota e ola ai, e lanu lau'ava vao ma laau e tutupu ma ola i ona auvai, e falala solo la o laau i ona luga a'e, e sosolo atu ona a'a gālala e mimiti ma inu mai ona suavai tofo lelei. A e o le isi sami e leai se ola e maua ai. E leai ni i'a po o ni figota e ola ai, e leai se tasi e mafai ona inumia lona suavai 'o'ona ma le 'a'ava. Peita'i o nei sami uma e tau fai fafagaina e le Vaitafe o Ioritana. O le a le eseese? O le Sami/Vai o Kalilaia na te maua mai le suavai mai le Vaitafe o Ioritana, a e na te toe avatu foi. Mo matāua taitasi e tafe mai i totonu, e i ai foi le isi matāua e tafe ese atu i fafo. O le isi Vai na te teuina uma le suavai e tafe atu i totonu, i matāua uma na te maua, aunoa ma se tulutulu e toe ave ese. O le Vai o Kalilaia e avatu ma ola. O le isi Vai e talia ma teu mau, ma liua ai e 'o'ona ma 'a'ava, e pē ma mate ma ua ta'ua ai, o le Sami Mate. 'Aua e te misia le a'oa'oga lenei! O le upu a le atunuu, 'e tupu mea avea, a e 'elea mea e teu pea.' Pe afai e te teu mau ma taofiofi ou manuia ia te oe lava, e te mate faaleagaga. Peitai pe afai e te alofa atu ma foai atu, e te soifua i se olaga malaulau malosi faaleagaga.

*"O le foai mea ia faia ma le matamau...o le fai mea alofa, ia faia ma le loto fiafia."* Roma 12. O la le Tusi Paia, *"E eseese a tatou meaalofa ua tufaina mai...o lē foai mea ia faia ma le atamai."* O tagata faatuatua uma latou te maua le alofa tunoa mo le faia o foa'i, peita'i o nisi o i tatou e i ai le mea alofa o le fia foa'i. O ai i latou nei? E ia te i latou le

mea alofa o le sailiga o tupe. O mea uma latou te aafia ai e taunuu manuia, peisea'i ua ia te i latou te pa'i atu e liu auro ai soo se mea. Latou te atamamai e fai atina'e, fesootaiga ma tuutuuga lelei. O le upu moni e tosina atu i ai fuafuaga manuia e pei ona tosina le uamea i le maneta. E silafia lelei auala e tele ai a latou tupe, oloa ma tamaoaiga eseese.

Afai o oe o se tasi o nei tagata, e tatau ona e iloa lelei o lou atamai e faaputu le tamaoaiga o se mea alofa moni mai le Atua: *"<sup>18</sup>A ia e manatu i le Alii lou Atua, auā o Ia na te avatua ia te oe le malosi e maua mai ai oloa."* Teute.8. Ua fetalai mai foi le Atua, *"<sup>17</sup>O a'u o le Alii, o lou Atua, o loo a'oa'o ia te oe i mea e aogā, o loo ta'ita'iina oe i le ala e te ui ai."* Isa.48. Peitai 'aua nei ta'ita'iina oe e le tamaoaiga i le loto faafefeteina. Ua e lē mau'oa ona o lou atamai e faataavale ma faataavili, a e ona o le Atua ua na faamanuiaina oe. Ma ua Ia faia faapea ia te oe mo se mafuaaga; ina ia avea oe ma faamanuiaga mo nisi tagata.

Na fetalai le Atua ia Aperamo, *"<sup>2</sup>Ou te faia oe ma nuu tele, ou te faamanuia foi ia te oe, ou te matuā faamamaluina lou igoa; e manuia foi oe."* Kene. 12. O lona uiga pe afai e pōpō atu e le Atua lou tau'au ma fai atu e fai sau foa'i, 'aua e te finau ia te Ia. Tau ina e fai atu, 'E fia se mea e te finagalo ai?' E te faapea ane, 'Aiseā o le a ou faia ai lea mea?' Auā e te lē mana'o e faatulaga ana mea alofa e sili atu nai lo Ia o Lē foa'i mai.

*"<sup>7</sup>Ia taitoatasi ma foai e pei ona filifili i lona loto."* 2 Kori 9.

E tofua le tagata ma le mafuaaga e fai ai lana foa'i.

(i) *O nisi e foai ona e mamafa i lona loto.* O ituaiga tagata ia e foai mo le galuega a le Atua, ona e mamafa i o latou lagona pe afai latou te lē faia.

(ii) *O nisi e foai ona o le matape'ape'a ma le tu'inaanu.* E ala ona avatu ona ia aumai. O tagata nei latou te faamamafa ma tū i luga o afioga a le Atua e pei o lea: *"<sup>38</sup>Ia outou foai atu, e foaiina mai ai ia te outou; e foai mai e i latou i lo outou lava ie pulupulu le fua lelei, e lolomi ma lūlūina, e tumu ma solo i tua. Auā o le fua tou te fuaina atu ai, e fuaina mai ai ia te outou."* Luka 6. O le ā se mea e leaga ai lenei ituaiga mafauaaga? Ona e ogatotonu ia te a'u, a e lē ogatotonu ia i tatou.

(iii) *O nisi tagata e foai ina ia ta'u'eleleia.* Ua a'oa'o mai Iesu, *"<sup>1</sup>Ia outou, ne'i faalialia la outou (faauma itulau 15)*



# O E UA FAI I LAGI FOLAUGA

## EPENESA ASOPOGISA

### IOSELANI POUESI

**28/12/1933 – 30/6/2021 (87+6+2)**

*Salamo 4: “<sup>8</sup>Ou te ta’oto, ma ou moe filemū; auā o oe le Ali’i e, na o oe lava, ua ou nofo ai ma le filemū.”*

Na soifua mai o ia i le Aso Tofi 28 Tesema 1933, ae fa’atofā mai i le Aso Lulu 30 Iuni 2021. E 87 tausaga, 6 masina ma aso e 2 na foa’i e le Atua ia te ia e soifua ma galue ai. Na maliu filemu lava i le maota gasegase i Moto’otua i le tuana’i o nai aso o fa’ata’otolia ai.

O Tinā Epenesa, o se auauna sa tautua i le tele o tausaga o lona soifua, i ona vala’auina o se Faletua o le Faifeau & Faletua o le Faife’au Toea’ina, a o mafuta ai ma le Susuga i le Toea’ina ia Rev. Elder Ioselani Pouesi. O se vaega tele o lo la’ua soifua galulue, sa tautua ai i le EFKS i Fasito’o-uta se’ia o’o lava ina Penisione. I nai tausaga mulimuli ane, sa toe vala’auina i la’ua e fai ma faife’au i se tasi Aulotu o le Ekalesia Fa’apotopotoga a Iesu i Samoa i Amerika, ona toe fo’i mai ai lea i Samoa e amata le Kolisi Fa’afaife’au a lea lava Ekalesia i Vailima, se’ia o’o lava ina vala’au le Atua i le Tamā. Ma o le taimi lea na ulufale mai ai le matāfale a Tinā Epenesa ma nai ona alo i le EFKS Loimata o Apaula, ma fa’auau ai lana auaunaga o se Tinā Penisione Malolo Manumalo.

Sa faia lona Sauniga Fa’aleaiga i le Aso Lulu 14 Iulai 2021 i le Malumalu o lana Aulotu EFKS Loimata o Apaula, ma sa fa’atautaia e nisi o ana lupe fa’alele ma ana feagaiga tausisi. Sa ta’ita’i e le Susuga ia Dr. Paulo Korias FS fa’atasi ai ma le lagolagosua a le Susuga Rev. Aokuso Lee, Susuga Rev. Fa’apea Asomua Elia, Susuga i le Toea’ina Malolo Rev Elder Tavita Anesone, Susuga Rev. Clarke Stowers ma le Susuga Pastor Siasia Paepae Namulau’ulu.

O lona Toe Sauniga i le Aso Faraile 16 Iulai 2021, sa vala’aulia ai lana Pulega Apia i Saute ma sa ta’ita’i lava le Susuga i le Toea’ina, Rev Elder Auva’a Peseta (EFKS Leufisa). O tatalo na saunia e le Susuga Rev. Poasa To’iaivao (EFKS Tanugamanono), ae o le Susuga Rev Ioane Petaia (EFKS Vauala) sa faitauina le Tusi Paia ma saunia le Lauga. O a’u sa

fa’aulufaleina lona sāl i le Malumalu, fofogaina lona molimau fa’aleagaga ma tu’uina ifo lona tino i le tu’ugamau.

E felanulanua’i ma tamao’aiga molimau uma sa fofogaina mo le tinā e le gata i lona Toe Sauniga, ae fa’apea fo’i i lona Sauniga Fa’aleaiga. E anoanoa’i ona aogā mo lona aiga, aemaise lava mo le Ekalesia a le Alii. O ona sao tāua e tele, o le a molimau mai pea i le lumana’i ma manatua ai pea o ia o se meaalofo a le Atua mo lana fanau, o ona aiga aemaise o le galuega a le Alii.

I totonu o la matou lava mafutaga fa’a-Aulotu, o ia lava o se fetū pupula sa fai ma faamalosi’au i le galuega. O ana galuega lelei uma, ia fai ia ma viiga o le Atua o Lē sa ia auauna ma le faamaoni i ai.

*“<sup>13</sup>Na ou faalogo foi i le leo mai le lagi, ua faapea mai ia te a’u, “Ia e tusi; Amuia e ua oti, o e ua oti o i le Alii e amata i nei ona po.” “O lea lava,” ua fetalai mai ai le Agaga, “ina ia latou malolo i a latou galuega tigā; auā foi o a latou galuega e mulimuli ia te i latou.” Fa’aa. 14.*

Soifua ma ia manuia.

Saunia: Susuga Letupu Faauuga Mata’utia FS,  
EFKS Loimata o Apaula,  
Matagaluega APIA.

### MEA’AITATAU MALE ASO

*amiotonu i luma o tagata, ina ia iloa ai e i latou; a faapea, ona leai ai lea o so outou tauai mai lo outou Tamā o i le lagi.” Mata.6. E lē gata ina fiafia le Atua i mea e te foai atu, a e faapea foi i le mafuaaga e te fai ai lau foai. E silasila o Ia i tua atu o lau foai ma lona aofa’i, i le faavae ma le pogai e te avatua ai. Pe afai e te avatu i le Atua ona o le matape’ape’a ma le tu’inanau, o le agasala o lou loto, pe ona o le fia viia e tagata, na te tusia le O lapo’a i luga o lou igoa – ua uma ona toe tauia oe. Ua fetalai Iesu, “<sup>3</sup>A e avatu ni mea alofa, ‘aua nei iloa e lou lima tauagavale le mea ua faia e lou lima taumatau; <sup>4</sup>ina ia lilo au mea alofa; o lou Tama foi, o Lē silafia i le mea lilo, o ia na te avatu se tauai ia te oe.” Mata.6.*

*(iv) O nisi tagata latou te avatu ona o le loto faafetai. O i latou nei e fesili, “<sup>12</sup>Se a se mea ou te tauai a’i atu i le Alii ona o lona agalelei mai uma lava ia te au?” (Sala.116), ma latou foa’i atu ai ona o le faafetai. O le ituaiga lena e tataua ona e i ai.*

# O LĒ UA FAI I LAGI FOLAUGA

## EPENESA ASOPOGISĀ POUESI, TINA PENISIONE



Epenesa & uso ia Peka Luamanuvae A. Lee



Epenesa ma nisi o lana fanau tausi



Malumalu fou, EFKS Falealupo-uta, faapa'ia 1 Oketopa 2021